

KICO A PASA CU STEELBAND RIBA NOS ISLA

Diaranzon anochi a ser teni den Cas di Cultura na mes momento cu Tumba Contest tabata tumando lugar, un concierto di steelband.

Segun mi tin entendi, masha poco a ser menciona di historia di steelband riba nos isla of masha poco tabata conoci di e historia aki.

Mi no por para tras di e informe menciona ariba pasobra mi no tabata presente, pero si por menciona en corto algun aspecto, saca for di mi documentacionnan riba **STEELBAND NA ARUBA**.

E PROME PASONAN PA STEELBAND

Aruba a conoce un epoca caminda tabata tin un 10 pa 15 steelband, pero den paradanan di carnaval ta 5 pa 8 tabata haya dependiendo tambe di e aña di carnaval.

Na 1945 cu **Lennard Turner**, conoci como **Shu**

Shu Baby a sali riba caya cu imigrantenan di islanan britanico na **Bachelors Quarters** y baraknan di **Esso Heights** pa celebra fin di e di dos guerra mundial, por bisa cu historia di steelband a cumenza riba nos isla.

E tabata tin blekinan (bari) cu a ser traha di barinan di petroleo obtenibel na Lago cu tabata yen di esakinan. Despues di 1948, e steelbandnan a cumenza plama poco poco.

Naldo Brown a cumenza cu su grupo den Village Noord, no mucho leeuw di su cas **Edgar Connor** y tambe su ruman **Paul**

Connor a cumenza prepara barinan pa steelband, tur di nan cu asistencia en principio di **Shu Shu Baby**.

Nan a muda despues pa Rooi Hundo, mientras cu **Paul** a bay pa residencia di **doña Tatica** na cruzada di Golfweg. for di unda despues el a bay Hulanda cu **Antillean Stars**, pa cual mi mes a toca varios aña tanto pa caya como riba



stage y yuda cu trahamento di bleki etc.

Antillean Stars su nomber a cambia pa **Antilles Steel Orchestra**.

Otro cu a traha su steelband cu tabata masha potente tambe tabata **Vincent Bacchus** cu mescos cu **Shu Shu Baby** tabata miembro di e steelband **Invaders** di Trinidad.

Ta for di e nomber aki, **Edgar Connor** a duna su steelband e nomber di

Aruba Invaders.

E mes tempo ey den prome añanan di decada 50, **Poncho** a bini Aruba y a lanta den Lago Heights su "**Devil Dodgers Steelband**".

Lord Boxoe a forma su steelband "**Black Diamonds**" cu tabata mitar "road" y mitar "stage".

Dennis Jones a forma su steelband na **Rooi Hundo** y sigui despues na duna un man na varios otro di nos isla.

STEELBAND A PLAMA ROND ARUBA

Despues di e periodo ey di steelbandnan di San Nicolas a drenta e periodo di steelbandnan rond di nos isla den decada 60 pa 70. Nos a conoce **Savaneta Stars** cu a wordo instrui pa **Dennis Jones** cu aña pasa a fallece na Rotterdam, Hulanda. Un persona clave tras di e steelband aki tabata tambe **Ronny Kock** cu a yuda lanta varios steelband riba nos isla.

Ronny a pasa tambe pa forma **Jumping Jewels** y despues a yuda lanta **Tel Stars**, tambe **Red Stars**, y na Dakota a lanta **steelband** di **Dakota**.

Por corda ainda **Padu Werleman** cu **Sta. Cruz Stars**, **Naño Tromp** cu **Tanki Flip**, **Jossy Lacle** y **Buchi Boekhoudt** cu **Paradera** y cu **Twinkling Stars**.

Mi no por pasa e ruta di steelband sin menciona **Sunny Isle**, tambe familia **Danies** cu nan steelband di **Tanki Leendert** cu mas bien tabata cu blekinan pa stage, y menciona ademá **Tanki Flip Steelband** cu blekinan di caya.

Despues di **Weg Fontein Stars** cu te aña pasa tabata na bida ainda, y **Noord Stars** cu e aña aki

a conquista corazon di tur hende, e momento a yega pa duna steelband un bida nobo atrobe.

Aña pasa mi a yega di menciona cu tin hendenan cu ta dispuesto pa haci esaki. **Edgar Connor** (q.e.p.d.) cu tabata tin tur cos cla no a haya e apoyo ni colaboracion cu e tabata tin mester te cu el a bay laga nos algun luna pasa. Mi sa di contactonan haci caba na Trinidad no di awor pero di hopi tempo caba, y recientemente ultimo contactonan, pero sin colaboracion e 4 personanan interesa pa trece e bida aki back riba nos isla no por haci nada y steelband lo keda na un y kizas termina na nada tambe.

Esaki ta djies un resumen chiquito di steelbandnan cu nos isla a conoce como esnan mas popular, algun di e figuranan veterano conocedor di steelband, varios di nos grandinan di steelband no tey mas, pero nan nomber lo keda semper graba pa historia musical di nos isla.

Juby.